



normau

Text: Hans Jürg Zingg

Melodien: Volkslied-Potpurri

Begleitmusik: Roland Scherrer/Christian Schwander

dert dä dick bahnarbeiter mit em luschtige schnouz

wo znacht im suff sy frou abschlat

das nätte blonde frölein mit der äntefüdifrisur

wo scho zum dritte mau abtribe het

dä ggäderig puur dert im halblynige mit de hööche schue

wo zu syr dryzäjäriige schtiftochter i ds bett geit

dä härzig fisu mit de chrusle da uf sym roubrättli

wo fasch au samschti znacht e ladekasse knackt oder es outho usruumt

dä jünger gschäftsma da mit de pflegte länge haar un em siubergraue
volvo

wo zwöimau pro wuchen i aargou abe a ne sounaparty fahrt

di chlyni rundlechi muetter mit em velo u dr schwäre kommissionetäsche

wo ihres fufjähriige namittagelang i cholechäuer abe bschliesst

di zwe ufgweckten achtklässler uf ihrne töffli suber u pflegt

wo am aabe ir lääre wohnig ihri chöpf mit schnaps u zombiefilme füue

di frou im jeanscombi mit de länge bruune haar u dr zygarett zwüsche de
züntrote fingerne

wo ihrem bebee wes zviu grännet es dicks chüssi uf ds gsicht drückt

das voubuusige brünette fünfzähriige mit meiköp u minijüpli
wo sech scho am fryti nach dr disco lat la vouloufe u pär outostop e
sexpartner ufgablet

dr mittuauterlech lehrer mit béret u läderjagge
wo syne meitli ir schueu d hirni mit frage u d bluusli mit blicke löcheret

dä wacker inschtrfäldweibu mit em rötlechblonde bärtli
wo am liebschte regrutte u nid ungärn serviertöchtere vöglet

drzue di vilevile nätte manne
wo znacht im bett iri frou vrgwautige

u di schaare vo unschynbare froue
ygsperret i alkohouhushautige

churz u guet aui normale lüt
läse dr blick

di hei schliesslech es rächt druf z wüsse was geschter wider ir wäut uss
aus verruckts isch passiert

(1987)